



何仲默先生詩集卷第三

關西李三才校

五言古詩

武陵

武陵一何長遼遠不可測高林多悲風慘澹日無色  
黃熊啼我前白狐跳我側蛟螭蟠深淵下見奔雲黑  
沙蒸水亦毒我僕饑且踣辭家忽踰秋適此萬里國  
土風日以殊川域邈無極伏波有遺響吟餘轉悽惻  
何因托橫吹一寫千載憶

桃川宮四首

神宮轟飛觀結構俯層丘上翳萬年樹下映千尺流  
仙蹤久已沒百代傳其由荒塗橫白雲寥寥安可求  
其二

谿谷多青氛朝暮不可知雞鳴洞中樹輕暎散華池  
白石流丹液靈葩耀朱蕤誰能學丹術遂使塵網離  
其三

石洞無遺構空巖長松桂入深忽已陰升高稍知霽  
山光晚多姿谷響秋轉厲緬懷避秦者一往成永逝  
其四

谿中何所有磊磊多白石紫參生其陽青松植其北  
遠林商氣清絕巘夕光白何當發雲奏招我吹簫客  
自武陵至沅陵道中雜詩十首

承明播宸渙西適蠻夷州艱哉武陵山古道何悠悠  
狹谷不容幘水中無行舟仰探虎豹窟俯瞰蛟龍湫  
徘徊遲吾馬中心懷慄憂修程尚延亘我行何時休  
其二

羣山何透迤迤環峙如百城其上干青霄其下浮雲  
征出沒于萬態倏忽殊陰晴撫茲谿心目頗慰羈  
旅情

其三

何仲默詩集 卷之三  
亭午入大谷烈陽經中天樹木多鬱蒸石圻起焦煙  
掘地飲我馬數尺不得泉僕夫告饑渴揮汗墮馬前  
安得萬間厦坐使清風延

其四

暮投界亭驛候吏迎我前息徒茂林側飲馬山下泉  
落日四巖陰餘映高樹顛坐久吏人散濁醕聊自延

其五

驅馬山上行山高何巍巍修阪接飛翼百步仍九迴  
俛視煙靄中衆山鬱何壘茫然望四海萬物亦已衰  
簪我別京國朱華猶未希歲節忽復易何時當旋歸

其六

大壑百餘尺流水浩湯湯我行路中斷欲渡無橋梁  
誰爲理舟楫石亂不可航改轍上危棧登茲千仞岡  
臨深古有戒側足以徬徨

其七

叢薄被煙臯徑路紆且微利風振喬柯綠葉漸以稀  
日入羣動息林深衆響歸君看棲枝鳥大小必相依

其八

山深多樹木百里人民稀時有四五家茅茨隔山陂  
沙田不可耕何以禦歲饑門前數畝園祗收蓬與藜

平明出汲澗薄暮始得炊童稚那敢出但畏逢虎羆  
草黃納晚禾桑綠催官絲嗟爾遠方人辛苦誰具知

其九

山勢行轉促連峯相貫輪窈然林莽中乃復得垣途  
青壁結煙靄縹緲凌虛無層阿秀嘉禾下覆清水渠  
夙志好幽僻覽茲耳目娛公車雖少延顧盼忽已踰  
安得鼓清瑟日坐山之隅

其十

谷轉岡漸平策駕循陂陀遙望辰陽城枕山帶長河  
飛甍若鱗次居人一何多按節駐江館登眺崇山阿

南衢聞夜絃北里揚朝歌誰云接夷域文物殊中華

懷化驛芭蕉

芄芄芭蕉葉植此園中央繁綠布重幄層陰蓋高堂  
孟夏日初赫蕭森蔽炎光衆賓御華館四座借虛涼  
四序互更謝南陸回朱陽窮秋多風雨寒冬多雪霜  
危叢旦夕茂綠葉日夜黃本無松栢固安用誇其長  
徘徊視草莽零落同一傷

花崖梧桐

桐生何猗猗其葉何油油白雲蔭崇阿朝日照高丘  
感此雨露滋愧彼蔓草儔鳳皇久不至琴瑟誰可求

何仲默詩集 卷之三 四  
吾將緬繁絃庶以宣我憂

清平令

清平縣之令不識何爲者庭前長野桑庭後長山櫓  
猛虎上我城青狻啼我舍昨日出城去騎馬到部下  
部民道遮之持刀殺其馬入門顧妻子所居無完瓦  
秋風吹樹木白日落原野永夜空城中哀哀淚如瀉

平越

清晨發平越霧暗山益密僕夫各相戒路遠恐迷失  
薄午游氣清參差衆峯出雞鳴谿谷中始見崖上日  
雲葉分杳冥高原被葦實秋風起叢林興感乃非一  
悠悠遠行遊歷險難具述

新添

朝登七盤坡復下九折坂長風飄落日杳杳前山晚  
征夫行取薪夜入礪中飯仰視飛鳥還載觀浮雲卷  
還顧望鄉邑日與親愛遠公家尚有程安能速言返

平垠城南村三首

朝出城南村策馬入荆杞村中八九家煙火自成里  
兒童候晨光稍稍荆扉啓四鄰務收穫時復披草語  
昵昵何所云但言好禾黍

其二

秋陰結林霏細雨灑茅室牧放丘近郊牛羊不相失  
廣園散花林平疇藹風日長幼不出門咸知戀儔匹  
喧喧車馬中徒爲慕高秩懸輿當何時可使志願畢  
其三  
沉沉古陂水日暮寒更綠隔陂見居人蘿蔓纏草屋  
摘禾畱客飯採薪伐秋木童稚持竹竿雨中放雞鶩  
區區化外國猶得覩淳樸

普定

鼓絕掩山城空堂思超忽孤燈明夕帷悄悄涼風發  
落葉何飄蕭飛螢互明沒客牕臨古寺坐待微鍾歇

羅女曲

羅女年十五自矜好顏色山葉雜山花插髻當首飾  
蠻方立門戶男女多生涯昨聞城中市女出男在家  
上市買黃絲染緝作花布裙短衫袖長不惜雙腳露  
夜行山中道何處吹蘆笙我歌連臂曲曲罷動郎情  
動郎情與郎匹生女復長男三年始同室

關索嶺

噫嘻吁嶮巖何天設之危艱下有奔雷歎雪之飛壑  
上有懸崖石棧百折而造天嶽峯今巉巖回復今盤  
盤行人鴈陳而魚貫計分寸今躋攀飛鳥今折翼猴

孫兮無援苟失足殞岩而落箐今曾不足以克虎蛇  
之餐朝不見日夕不見月雲煙慘慘今晝夜寒噫嘻  
乎何天設之危艱我來倚絕壁而長望蓋不知蜀道  
之爲難

城南婦行

城南有寡婦見客泣數行自言良家女少小藏閨房  
青春嬌素手白日照紅粧父母偏見憐嫁我不出鄉  
前年彌魯亂腥穢入我堂弟兄各戰死親戚俱陣亡  
嗟哉華豔質忍恥罹兇強憂愁雲髮變辛苦朱顏傷  
昨聞故夫在消息通兩方百金贖我身三年歸舊疆

歸來門巷異人少蓬蒿長轉盼夫亦死兒女空在傍  
薄田無耕犢寒臘無完裳人生固有命妾獨遭此殃  
况復官軍至燒焚廬井荒主將貪賄賂百死不一償  
朝廷自有法出師亦有名妾身何足道無乃乖天常

平夷二首

滇南八月中綠林何萋萋居人亦相輟數里聞鳴雞  
路轉無詰曲山行少攀躋回瞻貴陽道只尺蹊壑迷

其二

夜宿平夷館風悲氣始淒月光皎東壁白露寒醬啼  
憑高視中原但覺衆星低長路心益壯浩歌天之西



涪萬

孟冬氣始肅葉落北風涼寒水歛溝壑餘輝照橋梁  
方舟下涪萬所歷非一疆崇朝越千里川塗渺蒼蒼  
浮雲帶城邑壯麗透且長况多古人迹覽之心慨慷  
登遊豈不美滯淫非我鄉

泊雲陽江頭玩月

扁舟泊沙岸皓月出翠嶺開牕鑒清輝照我孤燭冷  
高林散疎光遠渚接餘景縱橫銀漢迴三五王繩耿  
弦望幾更易客行尚殊境佳期邈山嶽端坐令人省

涿鹿道中

高城鬱莽蒼永路多荆棘日氣夕以陰遊氛浩無極  
城邊古時丘宿草蔓于域樹木何蕭蕭狐狸鳴其側  
訪古思軒轅嶽峯何由陟伊昔奮龍戰明明庶邦式  
神馭飄鼎湖烏號緬玄德遺踪邁荒野盛烈存茲國  
誰云戡亂功不俟干戈力風雲變俄頃明晦古難測  
薄暮窮林中怒焉長太息

渡白溝

春行傷旅思單車悵蹉跎晨眺黃金臺夕渡白溝河  
求賢不可見血戰竟如何落日古原下悲風入浩歌

叢臺

邯鄲多俠士趙地產名娼日夕高臺上歡宴殊未央  
黃金飾舞榭白壁綴歌梁安見千年後空令春草長  
五平五仄體

秋原何蕭蕭耳目去雜茸枯荷猶穿塘苦瓠尚抱隴  
寒風吹空林落日照古冢徘徊觀陳蹤露下髮忽竦  
迎霜降

烈風揚雲旗鼓角悲廣路庭前玉樹枝昨夜微霜度  
幽人躡葛屨出戶履寒素胡當戒堅冰及此歲將暮  
冬雨率然有十二韻

北風吹零雨冬熱雪不作二儀黯澹交百川莽迴薄  
沙霾翳白晝遠望何由豁六龍墮青冥萬象淪玄朔  
羲和扶日行紆轡竟焉託神媧補天裂鍊石恐遺落  
雨伯誰爲誅雲師爾何惡前者十月交震雷轟城郭  
岸條俱舍柔園卉亂吐萼農家忍朝饑歲暮食籬雀  
豈無數晦禾狼籍委秋電徵求皮肉盡枯骨待剝  
妻孥在眼前四季不得樂胡因見陽春所慮轉溝壑  
間居值泥淖展矚翻蕭索雖無長者轍自閉寒士閣  
長陰下修麓暝色起孤岳喧啾後棲鴉悵望暮歸鶴  
世途紛轉蓬生計倚叢藿永懷昔人駕冥心付寥廓

發京邑四首

弱冠遊 皇邑抽翰豫時髦出入承明地四海皆同  
袍浮歲奄七徂徇名虛所遭夙痾糾織質褊性憚形  
勞駕言返初服行矣遂林臯轉蓬戀本根羈鳥思故  
巢自顧無修翼安能久遊遨

其二

驅車出郊門杖策遵古行返顧望城闕引領內懷傷  
崇京隳霄漢逶迤一何長雙觀臨馳道群宮儼相當  
迅飈激櫺牖游雲起縱橫漢道值全盛纓綉爛輝光  
側觀青雲士鳴珮倏來翔梁生何慷慨遼遼悲未央

其三

親交遠集送歛策西山陰前瞻太行道却顧上死林  
青陽藹廢墟春氛感鳴禽所遇豈殊故卽事自成今  
平時等榮樂一旦異浮沉昔者同袍友邈若辰東參  
山海去靡極年運日相尋倉卒杯酒間寧不傷離襟

其四

行邁越長甸歷歷懷苦辛嶇欽陟丘隴髣髴望郊闈  
墟里接雞犬井邑無間人暄陽入廣陌臚臚周原新  
百城豈不美風土非我鄰遙遙盼鄉域言念故所親  
代越各有性所願還其真胡爲去桑梓鬱鬱冒風塵

度河

夙征肇延津明晨臨大河洪源下積石砥柱屹崖峩  
渺渺梁宋區汗漫縱經過自非陵與岸於安障其波  
揚帆赴中流四顧莽無涯崇雲徂廣澤迅風夕吹沙  
積陰不可測魚龍偃相加前無千尺梁一葦胡足誇  
人生寡恒居奚異波上槎豈無舟楫志漂泊當柰何  
許下

伊昔炎漢季西京方遘患宮室燒燔盡乘輿播草間  
劫遷留茲域荆棘滿頽垣橫流一以濫大厦盍復完  
豺虎互馳噬鴟鵂厲飛翻日月屢薄蝕風雲變無端  
嗟哉衆君子杖策起周旋荀公誠偉士弘思濟其艱

陳琳自南至王粲亦西還從我藉雄辯騰步有榮觀  
良蹇豈同御鳳鷲不共餐功名安足爲明義乃高賢

還至別業四首

雞鳴高樹杪狗吠墟里間家人望車徒遠客造門端  
入門問所親上堂敘悲歡行人暮饑渴秉燭具盤餐  
明月照西戶三星爛中天出門踐野草白露修已溥  
十年苦行役茲夕方來旋寧知非夢寐忽忽心未安

其二

詰晨親友至筐楛携所需各言平生歡念子久離居  
綢繆語未畢展席臨前除園榮亦已抽况有盤中魚

人情倦懷土富貴豈常於無爲泥形迹所願恒相俱  
其三  
依依入鄉間慘惻歷故疆行邁踰幾時所見忽以更  
成人匪故識耆齒日凋喪平生所同歡轉盼殊存亾  
羈魂邈遐域旅柩歸中堂人命不相持奄忽如朝霜  
撫事感今昔喟然熱衷腸

其四

弭駕及春暮比屋事耘耕時物展遐矚契我遺俗情  
故林茂以密敝廬亦將成芳蘭冒紫葳園柳尚垂榮  
澤葵蔓廢井瓜田依故城策杖衡門下仰偃遂平生  
所願在怡親餘者奚足營世情惡衰歎天道遞虧盈  
駟馬豈不貴翻覆坐相傾

七夕二首

逝節忽不處佳夕復我臨神飈汎光蕙渥露沾華林  
緬彼牛女會茲端竟難謀形影惜相望胡由接徽音  
飄颻翠龍駕髣髴青瑤簪長河坐移轉素波歛西沉  
靈彩歛以晦游雲起層陰同歡戀膠漆異處悲辰參  
翹思慕遠匹感此涕流衿

其二

舉俗慕良旦好尚各有趨高樓曝紈綺貧女無繒襦

移時曜靈沒素月復已舒群居修歡宴長坐獨愁吁  
愁吁亦何爲同禍與我殊春徂秋未返膏沐誰爲娛  
仰視河漢女相違復來俱要知比翼乖各阻天一隅  
乖離有重覲毋使寸心渝

水曲納涼

乘月玩清夜漱流滌煩痾竹栢夾修水微風揚澤荷  
苔陰皓露溽素鱗躍于波柔條紛斂結勁葉亦殞柯  
優游蕩情志俯仰丘中阿雖無朋儕和興言自成歌  
娛樂當及時千秋豈復多

雜詩二首

西陸移修晷素節多寒陰端居屏營慮淒氣慘人心  
浮颺委時卉零露傷青林仰見孤雌翔玄鳥無遺音  
蟋蟀何愁苦終夜長哀吟感物興慨嘆憂思孰能任

其二

馳輝在西山返景流東隅群欣被光灼何能待須臾  
重陰肅萬物樹木日夜踈叢蕙植幽闥含榮耀前除  
佳人眇雲端何由致區區常恐霜霰至委棄不我需

六子詩

并序

六子者皆當世名士也予以不類得承契納  
輔志勵益者多矣病歸值秋寤嘆中夜有懷

良友作六子詩

王檢討九思

王君青雲姿志豈屑丘壑名家出杜鄠少日遊宛洛  
奮身匹文鷁戢羽翼鸞閣興文燭雕龍揮翰凌玄鶴  
雅志在四海隨時偃經畧馳情繼謝眺日晏吟紅藥  
康修撰海  
矯矯龍頭士騰躍在明時群遊慕豪放棲志固有期  
赤驥鳴煙霄不受黃金羈揮毫御清讌浩思隨風飛  
鐙前激高倡顧盼孰與希究古摘遺編頗好斑馬辭  
良史久無稱斯文當在茲

何編修瑋

中州產名俊河內天下士平生飽藜藿學道櫪壯齒  
至樸歛華蔚微文陋雕綺守淵安可窺馳辯詎能止  
洞悟超仙幾微言析玄理曲高難為和行獨寡知己  
古轍多綦蕪非君誰予起

李戶部夢陽

李子振大雅超駕百世前著書薄子雲作賦追屈原  
新章益偉麗一一鸞鳳騫華星錯秋空燭火難為燃  
摛文固無匹投義罕比肩撫志冀陳力危言獲罪愆  
握瑜不得售寶棄誰為憐仲舒貶膠西賈生亦南遷

古來有遺憤非君獨哀嘆

邊太常貢

世事多戚促器識寡蕭散太常何瑰瑋坦然破厓岸  
祥煙拂瑤壇瑞日轉華觀出入諧鵷鸞頡頏在霄漢  
芳詞灑清風藻思興文瀾陽春誠獨步清廟徒三歎  
金奏響不虧玉樹開逾燦閒居檢遺篇啓篋得爾玩

王職方尚綱

職方吾益友契誼鮮與同少齡負奇氣萬里飄雲鴻  
手中握靈芝高操厲孤桐讀書邁左思識字過楊雄  
爲辭多所述結藻揚華風寸心素相許撫志慚微躬

十三夜對月

閒居愛明月良節復與俱金鳧麗秋闈皓彩揚雲衢  
澄空歛霜煙清颯蕩中區徘徊廣庭內改席臨方除  
顧景怵衷慮興心念居諸天道遞消長戒之在須臾  
懷謙可久安盛滿豈恒居執云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方  
離離絳霄側冉冉素雲揚踰時灑氛澈懸耀天中央  
仰視渺難卽忽覓在我傍清池含微波左右挹流光  
月行固當望人會何能常與子各鄉域邂逅臨此堂



良時不屢值明月安可忘醉歌荅未夕和我窈窕章  
十五夜高鐵溪同清溪趙雪舟馬百愚過敝居

對月

端居撫盛節眷茲金素中上客弭飛蓋惠然慰幽衷  
圓景舒東隅忽復周層空重輪爛五色繽紛結文虹  
流輝接瑤席絳氣鬱以葱衆賓侈佳翫聯篇抱華風  
情好在明月安問膳靡豐弦望有恒度明陰變無窮  
人生非比翼豈得常相同所願御此觴聊以娛夜終

十六夜月

日夕城煙歛列宿出復多開軒望明月展席流素波

圓輝雖少虧猶能遍天涯單居不爲樂念遠徒咨嗟  
美人越崇京高樓結綺霞浮雲暮長征何由覩光華  
迅颯萬里至霜露日以加坐憂桂枝歇委落同泥沙  
清輝苟相照豈慮天路何

十七夜月

夕望月已減雲颯蕩其側月減不足憂盈虛本相直  
胡爲蔽氛霾坐使清光匿踟躕久延待慘景鬱無色  
燈前理鳴絃瑤徽爲誰拭思我平生友道遠不可卽  
素書委篋笥安得雲中翼滄海多波濤長陰浩難測  
何當廣餘輝一照萬里域更深明復明揚秀青雲端

何仲默詩集 卷之三  
浮颺倏以寂長川靜波瀾徘徊廣除下白露棲崇蘭  
仰見城西樓迴光照文軒樓中織綺女延頸獨哀嘆  
歎未終已素河橫西山逝鬼不常望玉貌寧久妍君母  
吝光惠使我芳歲闌

擣衣

涼颺吹閨闥夕露淒錦衾言念無衣客歲暮祁寒侵  
皓腕約長袖雅步飾鳴金寒機裂霜素繁杵叩清砧  
哀音緣雲發斷響隨風沉顧影惜流月仰盼悲橫參  
路長魂屢徂夜久力不任君子萬里身賤妾萬里心  
燈前擇妙匹運思一何深裁以金剪刀縫以素絲鍼  
願爲合歡帶得傍君衣襟

悼往

行雲不歸山逝水難重迴與子一爲別流光倏如推  
形神往無存夢想弗克諧孤冢日荒穢幽泉翳窮埃  
重扃一以閉千秋寧復開時至展遐沉傾醑澆黃萊  
還思平生居歲久生夕苔寒風吹空閨彷彿鳴玉哀  
人生重恩義况茲比翼乖何能眷新歡棄置故所懷  
贈望之五首

遙遙京洛客承命發華輶朝辭異州野夕泛黃河流  
雙旃翔汝側駟馬登故丘故丘鬱以長岡隴茂松楸

車徒耀城郭親戚迎道周丈夫事四方州閭益久留  
王程在須臾顧念但懷愁前有盈觴酒爲我且綢繆

其二

清晨送遠人弭駕北城隈北城一何修前臨古時臺  
俛仰故鄉域一如平生懷季冬嚴風發積雪皓皚皚  
言念徂遠路鬱結不能開中林寒卉寂樹木何摧頽  
安得春華敷採掇以相貽

其三

驅車策良駟北上遵大行升高瞻崇京宮觀鬱相望  
前瞻碣石湍俯見東海疆壯觀局宇內高志何激昂  
孤鴻暮南翥奮翅起隨陽黃鵠遊四海胡爲悲故鄉  
何能有羽翼從子俱翱翔

其四

昔子當北徂值予復南旋相違踰幾時世事攸推遷  
訪舊半存亡誰能不摧顏浮雲歲暮征餘曜銜西山  
居人念川塗行子戀鄉關平生雙龍劍乖別何時還  
志士重明德窮達奚足歡願君勗令名相期在盛年

其五

人生寓大塊聚散如飈塵昔爲同禍好今爲異鄉人  
孤獸鳴索偶翔鳥求其群戀故各有慕何況骨肉親

子當被華綬結束事明君我當守蓬室聊甘賤與貧  
去住各努力良覲會有因

除夜二首

今夕復何夕偃仰茲歲周懸膏耀室隅中饋進芳羞  
雖無車馬客親戚自相酌遊魚安深淵翔鳥止故丘  
所歡在桑梓餘者何復求逝節不重至來者難預謀  
長跪奉此爵延年樂千秋

其二

閒居知時節習靜觀卷舒日月無恒處念往寡歡娛  
歲徂浮雲陰積雪皓中衢豫章產江濱孤蕙敷山隅

芳烈雖靡虧遐遠寧見需所願勗明德庶以酌居諸

豔曲八首

銜溝連上苑大道接平沙紫陌三千騎青樓十萬家  
城中楊柳樹風起暮飛花

其二

日出洛城裏歌鐘起四鄰朝遊桃李蹊暮踏車馬塵  
遊絲冒白日冉冉愁陽春

其三

秦氏字羅敷馮家名子都妝成臨勸酒曲罷坐當壚  
白馬金吾子青絲提玉壺

其四

明姿稱二人生長紫羅帷對客舞垂手邀人看畫眉  
今朝仲春日照影臨芳池

其五

粲粲東城子盈盈南陌姝自矜夫壻貴翻笑使君愚  
日暮採桑去空迴五馬車

其六

翩翩五陵兒籍綺冠蓋簪常懷雙寶劍詎惜千黃金  
馳馬章臺下紅塵不可尋

其七

蘭燈列滿座繁炬灼朱光富貴傾南國佳人出北方  
畫堂翡翠帳夜夜鬱金香

其八

高臺臨萬戶朱構耀城隈共藉鴛鴦綺雙持鸚鵡杯  
春風樓下度一夜百花開

擬古詩十八首

冉冉歲逾邁念君長別離別離在萬里道遠行不歸  
鷓鴣慕儔匹鸞鳥東西飛思展雙羽翼奮起凌天涯  
向風長哀吟欲舉中徘徊川途浩無軌霜雪愴以悲  
願因駐馳景得覲君光儀

其二

婉孌城東姝懷春一何早朝遊採桑陌暮止垂楊道  
自矜全盛時復恃顏色好玉貌隨年化安得不枯槁  
昔爲園中英今爲路傍草路旁多車馬採掇難自保

其三

名都有高樓上入青雲端修城延曲隅阿閣交重欄  
佳人理清曲當戶橫朱絃揚音綵霞裏令顏誰不觀  
賓客會四座絲竹哀且繁日中車馬至薄暮皆言還  
聽曲各言好知音良獨難誰爲同心人並起乘雙鸞

其四

壘壘北邙山松柏何修修松柏有時摧人命安可留  
朝爲華屋客暮沒歸山丘洛中多豪貴藹藹皆王侯  
高臺臨九衢上有百尺樓宅第儼相望軒車絡如流  
存亡不預保富貴安所求不如邀我友乘馬被輕裘  
遨遊百年內永以忘戚憂

其五

藹藹東園內綠林萋以繁車馬自成徑桃李終無言  
昔日東陵侯種瓜青門前既貴亦反賤變化更無端  
俗夫寡恒態志士多苦顏豈不策高路高路遠且艱  
良無萬里風孤翼誰當援

何仲默詩集 卷之三 十一  
其六  
朝日照中庭杲杲春載陽東風吹綠草蝴蝶雙飛揚  
歲華坐婉婉白露憐以傷予美不在茲所懷浩難忘  
豈無芳桂枝含香誰爲明

其七

淒淒仲秋日百卉腓以殘涼風入階樹零露摧庭蘭  
明月皎東壁昆蟲鳴草間孤鴻暮安適哀音揚雲端  
言眷平生友振翮起孤騫遺我若逝波望子如高山  
托忱在終始蓄久諒逾宣寸心不可移磐石誰爲堅

其八

鬱鬱山上松高枝布天涯上有女蘿草纏綿誓不移  
葛生蒙于楚浮萍寄清池貴賤雖殊途附託各有宜  
伊昔侍君子朝夕奉恩私馳心在皓首何意中睽離  
窮年守房室常恐踰良時思君如日月所冀光不遺

其九

汎汎東流河嫋嫋河上柳春風暮飄搖花飛不相守  
柔條欲攀贈何堪入君手惟有南山桐可以遺我友

其十

圓如天上月光輝尚當缺與君非一身安能不乖別  
關山日悠遠舉步難可越君如隻車輪妾心如車轍

相隨萬里去統統何時絕

其十一

清晨秣駑馬整駕遵路衢遲徊覽故物惻惻心以紆  
昔時千室邑今爲百年墟郭郭蔽枌櫓狐兔翔城隅  
人生寓大塊飄泊寡恒居諒無金石壽終與草木俱  
一身不自恤安用顧其餘營營慕富貴辛苦誠爲愚

其十二

長安多豪俠白馬一何驕金鞍競絡繹寶劍相招邀  
招邀狹斜道青樓鬱岩峩樓中妖豔女輕綺揚飄颻  
皓齒激清倡逸響干層霄浮雲散城邑白日隨驚颺

熒熒桃李顏華早仍先凋結交苟弗宜誰謂能久要

其十三

人生百年內胡爲形所役登高覽九原但見松與栢  
徘徊故里間念我平生戚斗酒相存問度阡復逾陌  
上堂展殷勤華燈永今夕何必傾庶饘濁醕聊與適  
朱顏難可常鬚髮會當白徧觀四海人誰爲不死客  
良時弗爲歡衰暮嘆何益死者長不作生者長不息  
日月更相送萬古安所極青絲有蒼黃岐路多南北  
在家常相問出門安可測落木歸本根飛鳥戢羽翼  
客遊在萬里終當還故域



何仲默詩集 卷之三  
其十四  
朝宴高堂上賓友相追遊  
厨人進豐膳妙妓揚清謳  
處世無百齡爲樂苦不周  
多財爲患害駟馬招愆尤  
安如王子喬高舉凌九州

其十五

歲暮寒風至蟋蟀夜鳴悲  
高樓有思婦嘆息不自怡  
良人行未適孤妾守空閨  
衾裯卷下寢羅帷誰爲施  
君如東流水妾如西馳暉  
形勢不相及彼此何由諧  
結髮重自念携手期同歸  
秋華殞故林尚復揚光輝  
顧茲各努力毋忘榮盛時

其十六

迢迢孟冬夜悲風鳴北林  
嚴霜被野草宛轉時欲沈  
故人久隔越曠若辰與參  
方舟不利涉欲往江湖深  
客從南方至遺我綠綺琴  
願因雲中翼寄子瑤華音  
膠漆不爲固金石安足謀  
明義苟不虧沒齒當一心

其十七

青鳥來北方徘徊朝南翔  
美人傳書至開緘爛生光  
貽我機中錦宛轉成文章  
上織比目魚下織雙鴛鴦  
物厚意不薄感激心徬徨  
裁爲衾與裯置立黃金牀  
君子不爲御三歲聞馨香  
一心奉公憲常恐君遺忘

其十八

繁霜降秋夜膏火寒無光淒風舉帷幄素月流中房  
客行在殊境獨處誰與將仰視天上星羅列皆成行  
牛女獨何辜犛犛守河梁嗟無凌風翼欲去不得翔  
引領長太息泗涕徒霑裳

何仲默先生詩集卷第三

何仲默先生詩集卷第四

關西李三才校

五言古詩

魯連

仲連初歷國排難能解紛飛書下燕將立談却秦軍  
不受萬戶侯長揖千乘君始稱天下士終爲海上民

張良

子房號人傑像貌非魁偉報韓志已成翊漢功亦美  
出奇擅三寸決勝在千里一遇黃石公還從赤松子  
望郭西諸峯有懷昔隱兼發鄙志

游龍戢淵鱗翔鷺振雲翮潛姿媚幽深遐羽忌拘迫  
頃來稅塵銜秉性嗜探歷連山秀我里幸茲瞻昕夕  
橫天巖巒疊映日蒼翠積涉波緬洄沿攀岑若咫尺  
流目施遠壘寫棕巢孤石嘉遯懷伊人俯仰慨今昔  
霞構象丹厓煙蘿裊青壁傾耳谷中音希縱雲外迹  
興性感彌深卽景無與適豈徒藉虛覲終然契冥寂

贈王文熙四首

空堂夕燈明離思漫浩浩泠泠朱絲絃聽我別鶴操  
出門難久留各言慎所好江湖迴且深鴻鴈幾時到

其二

行子夜中起月沒星尚爛天明出城去暮薄長河岸  
草際人獨歸煙中鳥初散解纜忽以遙川光夕凌亂

其三

光風轉柳枝宛宛路之傍濛濛苑中花朝日耀其英  
停車欲有贈攀條折春芳春芳亦消歇但使故意長

其四

息馬中林樹煙靄何氛氲遲遲仲春日叢薄華且芬  
上有單飛翼哀鳴振層雲冉冉征途客踟躕不忍聞  
嗟哉彼何物日夜求其群

暉功甫悼亡二首

何休集詩集 卷之四 二  
捐棄不待年幽魂渺仙嶠庭下孤鳴鸞懸鏡恥自照  
帳冷凝素塵慙虛耿熠燿平生白頭吟空然發悲調  
其二

芙蓉望秋零幽蘭歇芳早不作雙頭花翻爲斷腸草  
戚戚懷所思悠悠感衷抱睠茲白髮心窮年以相保  
悼亡三首

冬夜一何長展轉難及晨念彼重泉下杳杳隔千春  
中閨月皎皎紈素委流塵馳光安可追往者無復陳  
悽悽向隅泣無乃女子仁丈夫自有志忍哭虞傷神  
沉思結中腸悵悵不能申

其二

鳴雞報早朝出戶履晨霜仰視東方星三五不成行  
念子當此時燈前理衣裳恍然失所在零淚空滂滂

其三

皎皎機中絹拂拭明如雪裁爲雙中衣羅帶紛綰結  
親持向我前與我言結髮豈足佩下體聊以奉娛悅  
執此百年心嘆息一朝絕人故物自留欲視不忍發  
藏之篋笥中餘香日以歇

挽葉進士

矯矯松栢枝在彼丘中阿上盤青雲端蒼翠鬱差莪

惜哉千尺幹嚴霜摧其柯本爲大廈用不竟當何如  
贈李獻吉三首  
西方有佳士於世寡所諧橫風整脩翰倏忽超九達  
天門限重關屢扣闈者辭濟濟列仙子冠裳競追隨  
青雲蔽閭闔仰視何逶迤皎日匿西陸馳光難遽回  
世無魯陽子坐惜朱顏衰

其二

東風吹我衣白日何杲杲整駕出郭門修途浩潢潦  
登山采幽蘭日暮不及盈抱采之欲何爲遺我平生好  
豈無艷陽花言子好香草丈夫有本性安得不自保

寸心苟弗移可以鑒穹昊

其三

烈女守閨室憂日懷寸陰橫琴寫妙曲繁商激陽林  
悠悠行路子誰爲識其音人生處世間貴在相知心  
所以采薇士甘餓西山岑

答獻吉二首

鬱鬱雙鳳闕翱翔飛雲間我 皇乘六龍平明開九  
關下有敢死士批鱗犯其顏白日運蒼昊薄暮浮雲  
還一朝啓光耀忠誠良可宣

其二

何仲異詩集 卷之四 四  
吾君古堯舜垂袞蓬萊宮止輦受群善小大必有容  
緬懷燕鄒子悲號訴蒼穹彼蒼亦何神五月飛霜風  
至誠變金石何懼不感通

遊魯山城南舍二首

猗彼方外客逍遙城南野初夏苗始盛荷笠事田圃  
地僻寡鄰舍彌旬絕車馬紅葵生井上青榆蔭堂下  
前岡後有岑原澤何膾膾清風林下酌狼籍列樽俎  
翻思在朝市役役徒勞苦

其二

溪行日停午暑氣稍見侵脫巾坐芳草前有嘉樹林

白雲澹清景綠葉垂繁陰喜無鳴蟬聒幸有好鳥吟  
久厭區中緣撫茲意彌深浩歌答良友聊用開吾襟  
中秋十七夜留康德涵飲二首

飄風會浮雲白曜奄西藏羈人惜短晷眷此秋夜長  
長夜無與晤所懷浩難忘君子枉光駕嫵婉情未央  
披軒待流月展轉錯華觴臨觴慘不御對景久徬徨  
鬱霧暖庭陰黯黯如降霜流波委頽魄茲歲漸以更  
消長互相謝盛滿安可常勗哉君子心謙謙道彌光

其二

客心悲夕陰相顧增煩憂麾柝浩歌起欲去不可留

屏營獨撫膺仰觀熠燿流倏焉四宇豁衆星爛以稠  
游氣降大谷浮焱翕清秋昊天舒華魄銜耀西南樓  
朱門歇笙竽綺陌車馬休嗟爾晨明月燭燭安所求  
詠懷十首  
北陸無淹晷歲邁陰已長攝衣起中夜凜凜悲嚴霜  
明月麗高隅繁宿縱以橫徘徊仰天漢惋彼參與商  
形影未乖隔萬里徒相望

其二

烈炎灼崑岡乃辨金石堅金石有恒性銷鑠詎能遷  
薪樗莫傷桂刈蕭毋及蘭薰蕕不同器清濁有本殊源  
君覩高翔翼卑棲非所安

其三

英英園中槿朱榮媚朝陽朝陽倏西墮朗月借其光  
馳輝難久耀華隕不再揚番番白馬郎皎皎青樓娼  
容好豈足恃相要在衷腸

其四

積薪以待燔畜裘以御冬爲物貴及時餘者安足庸  
金張藉地勢衛霍承華封馮生守窮巷白首不見容  
賤者日遭屯貴者日以崇邈彼天上京玉宮闈九重  
高高不可測欲往將何從

何仲默詩集 卷之四  
其五

知鳥去惡木螻蟻戀腐莖復隍啓危滿爲山忌將成  
泛觀瀛海內巨細各有情哲夫炳身後昧者營其生  
千金買一壺爲豫當及早江湖多風濤舟楫不可保

其六

寂寂沅湘流長江上有楓青蕙綠廣隰綠蘅被洲中  
揚舲泝煙沚遙瞻二妃宮二妃何婉孌舉馨振微風  
解珮遺下女將以明我衷光采不易合精誠渺難通  
浮雲蔽江臯白日忽已晚還顧蒼梧原何時翠華返

其七

飛鴻遵故渚長鳴有餘哀北地多悲風霜雪日以催  
靈鳥集君舍君反見疑猜忠信苟不羈殺身亦何爲  
始知山梁雉欲下仍徘徊

其八

長安有綺樓文牕結朱䟽俯視千萬甍遙臨十二衢  
樓中彈瑟女容采耀城隅豈無吉士誘失身良爲愚  
迴風入總帳倏忽白日徂王顏易銷鑠不久當何如

其九

白露晞朝日茗榮委清秋長風吹野草飛藿不自謀  
猥彼衆多子安知良士憂覆水置平地一散永不收



鼯錯憂漢室翻爲六國仇禍機苟不測談笑生戈矛  
畱侯信人傑逝從赤松遊

其十

白玉本自白蒼蠅亂其真讒言解膠漆况匪平生親  
烈士死道傍貪夫登要津自古皆有然茲恨何當申  
蓬丘眇煙霧貝宮鬱嶙峋列仙如可期吾將躡清塵

東臯

藹藹東臯村中有幽人宅茅堂入空林草徑無來客  
林中桂樹英容采耀月夕寒香有時匱秋來望攀折  
贈邊子四首

自予辭京邑念子守南服歲序阻權觀川途積遐矚  
北鷺方自茲東輟偶相值聯鑣始牙中解纜及河曲

其二

同車越梁晉覽歷多古彊紆遲衛流汭轉盼淇水陽  
感來意不淺道故言已長辛勤眷途語愴惻悲別章

其三

戎馬暗中原嗟此遠行子遙遙赴城闕戚戚望桑梓  
路阻難可通河清詎能俟仰君父間出處良在此

其四

權聚理無恒悲離情有傷况茲征途間詎能久相將

何何黑詩集 卷六  
浮雲興歲暮素雪翳晨光揮手自茲別後期應毋忘  
贈望之四首

嫋嫋孤生楊迢迢河水汭平生骨肉親婉孌相諧悅  
思心起懽燕何況當乖別浮萍寄清流聚散有歡悒  
與子同枝葉胡爲思離闊愧匪根與株莫能相固結  
德人重行義志士輕訣絕慎子萬里軀慰我長饑渴

其二

良時不克俱悠悠子行邁行邁之何方乃在萬里外  
汎舟涉江湘道遠阻湍瀨我心思桂林倚立增嘆慨  
河清豈無期柰此日月逝所願芳未歇及茲采荃蕙

其三

瓜生施于葛枝蔓自纏糾念我同胞人是子結髮友  
少小鍾慈育各言常相守出門有羽翼忽下離隔久  
戚戚去兄弟思我父與母種瓜莫種棘種棘恐傷手  
恩愛苟不虧離隔復何有

其四

絕裾不爲忍此馭寧顧危念子奉明君結義良在茲  
雖懷垂堂戒委質我所知白日豈不察浮雲蔽于斯  
孤葵慕太陽傾心亮不移勿謂長棄捐終當有返期  
送王宗哲少卿

蕭蕭出郊于行行涉河甸子身被王命駟馬輝雲電  
覽岳停華陰觀都指秦殿思子衛泉流渭滄一以緬  
平生共肝膽何云異鄉縣况我離骨肉子也常眷戀  
憶我連枝樹感子同洲鴈子行四方志努力思見面  
出城贈韓子

晨車去遙遙將子城之隅城隅何所有有荷復有蒲  
念當與子別思心立踟躕它人豈無友非子誰爲娛  
折荷勿涉水涉水濡子車安得瓊瑤華採掇爲子需  
過呂涇野宅同呂道夫馬君卿

夏訪呂子居乃在北城陰門館古墻渠上有高樹林  
展席流南薰開軒睇北岑况偕同心友聽比和鳴禽  
佳人出素帙高詞播名琛亮哉清廟瑟淒其白頭吟  
一彈意不足三歎有餘音因之覽玄古寥寥傷我心

鳴蟬

苑苑庭中柳蟬鳴在高柯上有西飛燕下有東流河  
美人堂上坐忘却門前道舉頭見鳴蟬低頭惜芳草

冬至

北杓指玄朔南景留嚴冬中衢返羲馭淑氣扇黃鍾  
微陽懼不力固陰密且重 至尊休時令端拱象欽  
恭閉關遏行旅執玉羅動庸天乃辟物祖日爲衆陽

何仲異詩集  
卷四  
宗耿茲一線晷邈彼九淵龍泰登自此肇復來豈無  
從聖人謹元始君子履攸終

贈田子三首

蓬途眷行旅綢繆未茲夕之子遡大江方舟自此適  
藹藹皇邑遊鳴鑣並京陌同袍四五人君爲遠行客  
婉嬾一室內安知形影隔人生重貞固豈必金與石  
念彼膠漆友喟然感今昔

其二

蒼蒼季冬夕積雪委中衢三星出東戶纖月揚西隅  
主人樂行觴衆賓且停車何況平生友夙昔共懽娛  
慘惻高堂上爲子重踟躕山川緬以邈歧路在須臾  
出門慎自愛慰我恒相於

其三

鳳鶩去南國徘徊翔紫庭毛羽紛葳蕤霜雪日以零  
一鳴已曠世奮翅排清冥崔嵬南山下修竹何亭亭  
文采忽遐遠佇立望爾形依依此堂隅儔侶念伶俜  
相聚不須臾一散如晨星我欲從爾去但愧無修翎

七夕劉子緯次君卿

良時屆今夕懽覲諧茲方流飈委芳卉清池激微涼  
仰觀牛女星熒熒河漢傍纖月揚西隅浮雲起中央

何仙詩集 卷之四 十一  
合離一以愴明晦古難量繫于場下駒慰我長思望  
斷絕詞  
孔雀慕儔侶回翔恐相失羅鷲爲雌雄反覆不成匹  
白沙搏清水誰能作膠漆本非骨肉親心志安得一  
牽纏無已時斷絕有終畢

玉岡黔國地種竹

玉岡一精舍五華東南首崔嵬瞰城郭曠緬開林阜  
球琳美梁域篠蕩卑楊畝崢嶸將軍弟瀟灑文儒囿  
霜凝戟門寒日上鈴閣晝寒帷散琴書緩帶接賓友  
風林清夏簟雲石靜秋牖參差萬琅玕照耀雙瓊玖

連城價自高傾國貌俱醜繆倚慚蕪葭先涓謝蒲杯  
上公勲不忘君子名詎朽蠻夷欽鎮靜風俗化溫厚  
此德亮無瑕抱節誠可久珪璋寡琬琰瑚璉重典守  
至寶天所慳珍產地非偶閔顛神仙宅瑤水蛟龍藪  
安知王母觴復爲周王壽獻從萬里餘種已千年後  
靈秀萃于茲積累固所有樂只邦家光斯詠播人口  
贈君采効何遜作四首

霜空鴈絕響風庭葉罷飛念爾別離日淒然芳歲微  
城隅明星暫曉闌殘月輝不見携手好宵行誰與歸

其二

平生寡所諧與子中邂逅讌語殊未厭絃柱促離秦  
目斷川上雲念攢天邊岫河山邈以綿佇立阻權覲  
其三

居人日縛束行子逝飄飄山樓憐霧夕水泛悅霞朝  
違俗勢靡合遺名跡自超愧隨衣冠侶振珮青雲霄  
其四

歲宴客來歸車馬一何亂新粧下機笑白髮倚門看  
未俟春林敷且玩冬花粲閒居有徽音儻付雲中翰  
酬贈王德徵

北方有一士雲冠瑤華簪抗身服高義脊翹翔天林

一鳴遠見斥棄置南海潯飛黃本冀產顧盼無千金  
絕景邁流電豈與泥沙沈邂逅頃三接一言荷知深  
投贈古錦篇宛聆哀玉音大雅久寥寂斯文竟誰諶  
皎皎空谷駒生芻勞我心

江畚行

樹穀江上田三年免饑餓富貴苟非道千駟底一唾  
匹夫不奪志擴士鮮無過蛾眉召讒妬西子蒙詬沈  
鑠金懼衆口懷璧誠賈禍蛇龍蟠泥沙鯤運海水簌  
子今還山中食穀且高卧

詠衣

在何異詩集  
卷之四  
三  
淒淒絺綌風慘慘葛履霜無衣歎幽奏同袍感秦章  
物微申有贈德音亮難忘新纁託故素溫燠念寒涼  
體裁合情志拂拭生輝光雖云異黃裏願言同聚裳  
古怨詩五章

隕葉亂舊枝飄塵就岐路遲徊決絕意言念平生故  
泥泥行間泥零零蔓草露豈不畏沾污爲子無晨暮

其二

抗義一何明結志春不解對面有背棄何言萬里外  
陟疆朝采葑陟畛暮采菲所重在德音容色安足恃

其三

白玉雖光輝瑕疵在其內徒看色笑親詎識肝膽異  
勢奪恩愛移交離讒毀至棄捐豈我傷卑薄乖情義

其四

寸心抱貞固投一安有它詎知所同懽散聚倏朝霞  
昔爲山上石今爲浪中沙孰云無轉移漂蕩令心嗟

其五

清晨臨御溝御溝東西流垂楊夾廣路躑躅行紫驪  
揮鞭不顧返斗酒誰能留慨焉中道情覆水倘可收

情詩

出門景將夕入門露已灑徘徊雙戶間粲爛三星上

王顏豔明魄一別阻弦望詎能輕訣絕徒令重惆悵  
詠表

羔裘故人物持贈何殷勤儉表素絲質光迴錦繡文  
豹祛未稱美狐白安足云意此緋袍戀恩同續絮溫  
飲酒

平生多意氣四海盛交遊列筵亘長夜譚辯雄名流  
枯酒一言合遽將肝膽投入門顧兒女忸怩但懷羞  
齒年逮今茲世故多所由興言念親戚骨肉嬰我憂  
寒宵寡懽悰濁醪聊自謀明燈耀室內盤蔬代庖羞  
豈必朋與賓妻子前勸酬語笑率真性無嫌亦何尤  
人生貴止足無志卑公侯數觴已復醉頽然萬情休  
寄言馳騫子從今任去留

送劉御史按淮陽諸郡

臺臣今按地 聖祖舊開疆白雲萬里來千載還  
帝鄉伊昔草昧初血戰塵茫茫一馬渡天塹六龍飛  
淮揚堯階起三尺禹跡遺八荒江海控形勢邦家存  
紀綱遐哉百年餘世變隳其常城社穴狐鼠當塗走  
豺狼君埋都亭輪再觀司隸章述職屬茲歲巡狩代  
我 王泛舟淮泗急褰幕風日涼鷹隼在寥濶一擊  
乘秋霜



遊洪法寺塔園土山

塔園鬱森萃土山莽迴互迹陳慨往躅心賞諧秋晤  
時惟冬氣交零木爽登顧裊裊拾層級盤盤折脩步  
憑危眺倒景俯檻驚流霧空王湧廟衛貴者留墟墓  
三門上岌業王柱撐雲露白日寶光垂清風金響度  
徒興雍門哀未暇首丘慮珠藏北却毀石罅南山鋼  
恒焉傷逝心川汜激東鶩

贈時亮

戴子有仙癖時荷金門遇避穀遊人門嗜酒尚玄素  
白日指五岳笑我不能去爾未生羽翼何時向煙霧

贈子言

張生神馭骨一蹶在衢路雖有萬里才未蒙千金顧  
腰佩白玉環手擲金聲賦堂堂烈士身勿爲名所誤

冬夜

膏火含朱光王鎗泛清醴閒房密以靜雪流牕戶裏  
良友不我適室阻悵伊邇異人非我儔聊酌娛妻子  
十二月朔日大駕觀牲

玄雲翳廣陌素霰霽會城萬乘屯蘭甸六轡儼天行  
輕飈轉芝蓋重霄揚翠旌玃玃劍珮合鏘鏘龍鳳鳴  
犧人脫衡輻膳宰翼旁楹牛羊上廩貯鹿豕大庖盈

何仲異詩集 卷之四 七  
馨香流秬鬯肥脂奏牲牲宮闕回 帝覽鉦鼓感  
皇情至敬肇茲達大禮須時成

簡君采

夕會星已羅晝接景將落見面不須更何以展契濶  
側耳金玉章音響時聞作假寐晤清顏傾光豈虛託  
枉驂悵雲轡命席耻塵爵徘徊翳雲日佇立眺城郭  
駢居淹晨暮庶俾思心豁

送崔氏四首

行車在門端送賓集城隅轅驥難久停振策中路衢  
盤盤大行谷往念高堂居還顧望西山曾嶂蔽 皇

都回颺赴迅響飄雲奔長徂昔余昔鄉域倦言返田  
廬驅車赴燕薊茲歲奄七踰何因附羽翼翹首南翔  
鳧

其二

疇昔衣冠士同遊若雲爛懽讌未及終存亾在轉盼  
亾者長沉埋存者各飄散俯仰天地間念之一惋歎  
出門送我友言返故鄉縣登高望古彊河衛浩以漫  
山川白日冥匹鳥鳴相亂愴惻懷征塗令我腸中斷

其三

結髮與君友附驥思一鳴君子揚休景邁世垂榮名

伊余守屯蹇學宦寡所成握瑜侯知己知己誰爲明  
良時展嬾婉之子復遠行衝飈起閶闔浮雲翳太清  
曾城羅宮殿躍馬振綏纓長嘯歌五噫投策出漢京  
慨念古人士去之一何輕貧賤豈不安富貴非我營  
終焉從子逝無爲世所嬰

其四

飄飄山上葛纍纍田中瓠苟非同根蒂纏綿安得固  
人情易反復結交有新故嗟哉夙昔好乖棄在中路  
明珠倘有因按劍不我顧深言匪有裏白首爲所誤  
亮君最恒德未副平生慕

寄贈王氏子衡四章

昔餞邁伊始今懷緬猶故城憇屢淹薄舟遊一洄遡  
弭節指頽景搖車首東路倉皇抗手別邈絕賞心晤

其二

賞心睠景光川汎渺徂征竄身窮海上卧病天邊城  
傾歌島岸圻蹙沓波樓驚飄音承來訊頗敘棲泊情

其三

棲泊倦淮堧量移遂山郭沈迷謝簿領蹇開盡巖壑  
雲翔葉縣鳧風唳華亭鶴果諧宣城興復枉臨海作

其四

臨海疊靈巘洞壑丹霞林名勝紀圖牒仙聖秘幽深  
俗營迂微尚曠懷俟同心儻追凌風步滅響升雲岑

集吳子寺館

首夏憇祗園遊息解冠簪牕楹抗䟽敞殿宇闕深沉  
綠竹帶陰渠丹葩綴陽林旣枉高人躅亦協靜者心  
琴書散煩慮鍾磬發幽音清言忘朝晷玄思超古今

夏夜薛子宅

飄風激踈牖飛雨散高庭白雲蔭華月青天垂列星  
褰裳望西苑園樹發青熒陰館碎炎埃峻檻臨巖亭  
泠泠永夏井肅肅玄夜扃披霧聆霏談逍遙暢神形

遊心娛竹素此樂誠可經

贈君采

蕭散綜琴書疲疾謝回亂清雲汎闌暑白水激文瀾  
於心懷我友翩翩振詞翰比室諧言晤撫景悅流翫  
孔公讚龍蠖莊生明吹萬理感由神詣情賞非虛歎  
鄙哉辯雌霓安知睹河漢願投忘形契去適無窮岸

高橋

飛梁何裊裊裊裊飛澗中窈窕入青靄蜿蜒垂白虹  
俯壑聆迅湍攀崖挹迴風闌干旣重複結構亦玲瓏  
穿石鑿坤良架閣憑虛空羽填鳥鵲岸力坼鼉鼉宮

何仲異詩集 卷之四  
設險固天造扶神豈人工聖代文軌一絕域賓王同  
梯杭無外至筐篚倏然通懷哉絕棧智逝矣當關雄  
欽誠慕在德其亡守無窮

姜子嶺至三岔

出嶺上雲霓入谿下煙嵐高高不可極杳杳詎能探  
朱崖秀夏木石壁映寒潭千林鬱葱蒨百丈窺澄涵  
崩奔谷響赴隱曜川光含登陟力不辭險阻情已諳  
潛淵羨垂綸越巘思停驂振策岷峨西揚帆江漢南  
臨深匪忘懼履坦但懷慙

青石崖棧

側行青石棧誰能久延竚斷板連曳雲噴泉灑飛雨  
迅流西回激峻坂東折屢隕岸三傾欹危梁裊撐拄  
飲猿駭游鱗立馬接翔羽慎爾千金軀永念垂堂語

寄粹夫四首

伊昔京室娛安知岐路戚君就河內棲余從關西役  
同源異流止撫事乖心跡終爾返輪鞅音塵慰岑寂

其二

肥遯世久欽苦節晚逾峻懸蘿邈莫攀翠壁迴千仞  
冥心道與超晦迹名反近將遂偕龍蠖混然保貞順

其三

何仲默詩集 卷之四  
昔聞孫登嘯千載識其音  
岩堯百門上髣髴三湖陰  
鴻舉已寥廓鸞響猶空林  
曠哉既往古契此徵于今  
其四

阮公雖曠達於道未直見  
石髓不可餐赤文詎能辯  
服理昧情性眩物矜神誕  
倘君示中行遙垂大人撰  
渡涇渭

北回亂涇渭東眺極澄瀛  
落日兩盪涵逢天雙帶縈  
波流互明滅圻岸屢崩驚  
隔樹望迴合分濤揚濁清  
堰渠饒上壤形勢迥西京  
漕挽通秦甸津梁跨漢城  
湮沉九州會雄壯八川名  
空抱入河志復含浮海情  
風沙滿世路雲浪渺江程  
鵲去星源遠鯨翻霧島輕  
片帆倘可借萬里自茲行

何仲默先生詩集卷第四

仙傳異言集

卷之四

三



